

OMUKULUKADHI



40c.

No. 5

ISBN 0-620-06828-0

YAALI KOSHAANGO, OTAA PANGWA IILALO YOMADHENGU MONANDJOKWE

Omusamane Shindjala shaNghaamwa (70), ota pangwa olupati niilalo iikwawo yomadhengo, manga omukadhi Viktoria Shiindi naye wo oku li mOnandjokwe ta pangwa okwooko. Pahokololo lyawo yaali oya dhengwa ketanga lyegameno, sho inaa ulika ompadhi ndjoka inaa ye yi mona pegumbo lyawo.



Omusamane Shindjala shaNghaamwa, ngoka ta pangwa olupati noshu wo iilalo iikwawo yomadhengo mOnandjokwe

Oonakupangwa mbaka otaa ti, Etitano (6.3.1987) ongula pomulongo manga ye li mepya taa longo, omahauto getanga lyegameno oge ya pegumbo lyawo momukunda Uukango waShindjala, popepi nOshaango muuzilo wOndonga. Oshaango oshi li konyala ookilometa 60 okuza pOndangwa.

Pakudhimbulukwa kwawo, omaloli ngoka oga li getanga ngiika lyoArmy, ge li gatano. "Otwa mono po Aatiligane yata tu nAaluudhe oye-ndji," osho ya ti. Omusamane Shindjala, ngoka e li wo mwene gwomukunda ngoka, okwa ka

tsakaneka aayenda keelo. Oye mu pula ngele okwa mona ompadhi ye enda pegumbo lye, ya SWAPO. Manga inaa yamukula, Omutiligane gumwe okwe mu nukila nomankawa.


Oya kutha omusamane noye mu fala koluhwa hoka kwa li okandombe komeya. Oye mu kwata komagulu nokuthindila omutse gwe kofi yomeya mokandombe hoka. Oye shi ningi iikando itatu. "Onda li nda hupagele mo oshimati lela," osho a holola onkalo ondhigu ndjoka kwa li nayo kofi yomeya.

Sho ya mana oku mu ninginitha mokandombe, ehokololo olya ti oye mu fala natango mokaluhwa moka ye mu dhenge niivugati iitalala sigo a kanitha omauvito agehe molutu. "Aniwa naasho ye eta ndje pegumbo, oya li taa dhenge natango, ihe mpoka kandi shi we mpoka ndi li uuyuni, omukulukadhi gwandje ashike ta hokolola sho nda ningi omwenyo," osho a tumbula noluhodhi olunene.

Okakalata kepango lyomundohotola moshipangelo, omusamane Nghaamwa olupati lwe kolumoho olwa teka nolwa tsila meni. Ominwe dhoshikaha natango shombinga tuu ndjoka, ndatu odha teka, nagumwe gwokoshikaha shokolulyo.

Kuku Viktoria naye okwooko kwokolulyo oku li mosamende, iilalo molutu nayo otayi monika, ihe ota lili unene uuwehame wokwooko. "O-

Tala kopardja 11



Omukulukadhi Viktoria Shiindi ngoka naye e li moombete mOnandjokwe

“OMUYEVANGELISTE GWOMUUSHIMBA” A SHUNA KUSOOMI

Omutumwa gwehanganotumo lyaSoomi nomulongi meme Kirsti Asunta, okwa shuna koshilongo shaandjawa, kuSoomi a ka vululukwe po kiilonga yetemo mbyoka a sikuuka nayo muNamibia oomvula 17 dha zi ko.



Meme Kirsti Asunta. Ethano olya thane-kwa sho e li pokushuna kuSoomi.

Feelani Asunta sho a thiki lwotango muNamibia 2.9.1966 okwa kala ashike ethimbo efupi ti ilongo elaka mOwambo noku ka tameka elongo lyosikola yuunona waatumwa kOshiwakopo (Swakopmund).

Ina tseyika unene mOwambo, ihe oyendji mboka ya longo nenge ya talele po muSwakopmund, oye shi oku mu hokolola. Oshihauto she osha ende aluhe tashi teka po koofulaha dhoma-mbo sho ta landitha mokati kaaniilonga.

Oshihauto she osho wo sha kala ombasikela yaa-yevangeliste ya ELCIN mboka haa longo muSwakopmund oku ya dhingolokitha nomahala goshilando sigo okoomina dhomomudhingoloko.

Egumbo lye olya kala lya fa ohotela kaanashilonga oyendji mboka haa zi mOwambo. Okushuna kwe okwa lya oyendji oluhepo muNamibia. Oye okwa li oshikwiila shAanamibia oyendji, omuyevangeliste gwa ELCIN.

Kalunga ne mu shunine ano ashihe shono a kanithile meyakulo lye mpaka. Okwa shuna eti 9.2.1987.

Sebulon Ekandjo

Uuteolohi Oshike?

Oshitya “uuteolohi” otashi holola elongo kombinga yaKalunga, noshitya shoka oshe tu zile mAagreka. Oshitya uuteolohi osha kala ko nale manga nokuli ukrite inau tameka. Miinyolwa yomufilosofi Plato, ote shi longitha uuna ta hokolola omahokololo gAagreka moka taa popi iilonga yookalunga kawo, ihe ite shi longitha uuna ta popi omadhiladhilo ge kombinga yaKalunga.

Plato na Aristotles (aafilosofi), oyi itaala kutya aatoti yiitewo ngaashi Hormeros na Hesiod oyo aateolohi, oshoka otaya taalele omadhiladhilondunge goshitya uuteolohi maantu mboka ya hokolola omahokololo taga popi ookalunga.

Ihe yo yene aahokololi yomahokololo inayi itala kutya yo aateolohi. Omuprofesoli N.Koning okwi itaala kutya oshitya uuteolohi oshi na omadhiladhilohempululo.

Oshitya uuteolohi osha tameke okulongithwa uunake mOngeleki?

Miinyolwa yoohe yOngeleki (ano aakriste yopetameko), itamu adhika elongitho lyoshitya “Uuteolohi”. Pethimbo lyoohe yongeleki “evangeli oyo uufilosofi wa yela). Oohe yongeleki kaya li yi itala mo muuteolohi mboka wa talika ko wa vundakana nomalongelokalunga niikalunga yaapagani.

Oshitya uuteolohi osha longitha lwotango mokati kaakriste moskola yomuAlexandria,

nosha longithwa kuOrigenes nomadhiladhilohempululo. Pauufupi uuteolohi owa ngambekelwa melongo lyaKalungakatatugumwe. Osha yela kutya haaluhe mondjokonona yongeleki elongo lyopakriste (dogma) lya ithanwa uuteolohi, aawe.

Okwa longithwa wo iitya yilwe, ngaashi elongo liinima iiyapuki (sacra doctrina), elongo lyeitaalo (doctrina fidei), etulokumwe nenge efupipiko lyeitaalo (fidei summa). Iitya ayihe mbika oya kala tayi pitathanako komeho noshitya uuteolohi.

Uuteolohi owe tu ukitha ano peni?

Uuteolohi otatu tu ukitha mokwiilonga iilongwa yontumba. Ombimbeli tayi topolwa miikandjolongwa ngaashi: Systematic Theology, Old + New Testament, Science, Ehistoli lyongeleki nsht.) mbyoka. Nonando moku yi tala ya fa ya topauka, oyi na edhiladhilo limwe, ethikilo limwe, noya kankamekelwa komukanka gumwe.

Ekankameno lyayo ayihe oyo Jesus Kristus neitaalo lyetu muye. Nuuteolohi kau vulu okwiilongwa komuntu ngoka e li kondje yeitaalo muJesus Kristus, aawe. Uuteolohi wa shili ohau konakonenwa owala meni lyeitaalo lyomuKristus ihe hapondje yeitaalo.

Noshinenenima muuteolohi okwiilonga Kalunga nomuntu, Kalunga ngoka a hololwa

mEtestamenti Ekulu nEpe, notatu ilongo onkalo yaKalunga pokati ke nomuntu omushitwa gwe, nosho wo eshito lye alihe.

Kalunga otatu mu ilongo ihe ngiini?

Kalunga itatu vulu oku mu konakona ngaashika omunongononi ta konakona okapuka kontumba nelalakano a mone mo onduge yontumba, aawe. Karl Barth ota ti: omuntu pankambadhala dhe mwene ita vulu okutseyana nenge okwiilonga Kalunga, ihe Kalunga molwesilohenda lye, oye te tu ihololele, nelalakano tu mu tseye.

Omadhiladhilo gaBarth otage tu fala moshitsa shoka, kutya Kalunga oye omulongi gwetu omunene. Oye te tu longo natango nkene tu na okukala naye nosho wo naantu ooyakwetu, sha kwatelela mo eshito lye alihe. Tu kale tu hole Kalunga tse tu hole wo aantu aakwetu, notu longe oshilongatamo muuyuni.

Moshitsa shotango tse aakriste otwa pumbwa ashike egalikano ongOmupisalom: “Omuwa tseyithila ndje oondjila dhoye, longa ndje omapola goye! Endithila ndje moshili yoye, ngu longe ndje, oshoka ongoye Kalunga, ho kwatha ndje! Onda ku tega omasiku agehe” Ps. 25:4-5.

Uuteolohi otatu tu longo kutya Ombepo yaKalunga oyo omulongi gwetu omunene, ngoka ta thikitha moomwenyo dhetu etumwalaka lyaKalunga, note tu longo tu kale aantu aavuliki yaKalunga. Nombepo oye tuu ngoka te tu zaleke uupenda noonkondo okulonga omaluvalo getu iilongahupitho yaKalunga. Ex.10:2, Dt.4:9-10.

Muuteolohi otatu longwa kutya Kalunga okwiiloholele aantu okwe ya kaantu mOmwana Jesus Kristus. Naantu yamwe oya taamba Jesus ongOmuhupithi gwawo, nayalwe inaye mu taamba. Mboka ya taamba etumwalaka lyehupitho lyaKalunga oyo mboka yi itaala kutya Jesus oye “rabbi” omunene, oshoka ota longo aantu ngaashika nguka e na oonkondo, nelongo lye olya yooloka nelongo lyaanongoramata Mat.7:28-29.

Konima yeso neyumuko lyaJesus, Jesus okwa tuma aalongwa ye, opo ya ka longe aantu ondjila yehupitho, ihe melongo lyaayapostoli Jesus oye e li omulongi omunene ta longo nOmbepo ye, Mat.28:18-20, Joh.14:26.

Shika otashi holola kutya opu na elyenge ndyoka tali kwatakanitha kumwe elongo lyaJesus nolyaalongwa ye. “Ihe tala, ongame ndi li pamwe nane omasiku agehe sigo ehulilo lyuuyuni”, Mat.28:2b.

Nonkalo yaJesus pamwe naalongwa ye oya hololwa sha yela esiku lyetililo lyOmbepo Ondjapuki, Iil.2. Kokutya Jesus oye Kalunga ngoka e li pamwe naalongwa ye, note ya zaleke oonkondo ongaalongihapu. Tashi ti Ombepo yaKalunga otayi gandja omagano gi ili nogi ili kOngeleki (kaantu) yaKristus, opo olutu lwaKristus lu tungwe nolu koke Ef.4:11-13, opo aantu ayehe ya thike mehanganano limwe omeitaalo, nomokutseyana Omuna gwaKalunga.

Naashika otashi adhika ashike uuna Evaangeli tali uvithwa nelongo lyopakalunga tali longwa, opo aantu yi itaale Jesus Kristus noya kale nokuvulika kuKalunga. Aalongi yoohapu dhaKalunga oye na okukala ya tseyana Jesus oye ondjila nokweenda mondjila yaJesus, opo ya pe ooyakwawo oshiholelwa shomeitaalo.

Ananias Iita

EFILONGHENDA

Mat.5:7

Tu tambulafaneni mokufilafana onghenda ngaashi Kristus e tu tambula. Ope na oitya ivali, efilonghenda nonghenda. Efilonghenda ongeenge omunhu we mu kulila modolongo ile we mu dika oshidjalomwa e na onghai, ile we mu londoka motuwa yoye we mu hanga mondjila a loloka keengeda ile ta yehama.

Onghenda ongeenge omunhu a hangwa kumukwao e kwetiwe kondjala, ndele ta kala e mu yavelela ko, ta ti: Onda mona omunhu a etwa mo kondjala, ndele ongeenge ye mu tupufa. Oh, oixuna shili, winya hata fi mumwange!

Ye ne ke na eshi e mu pa shokulya, okwe mu efa ashike a ya noluhepo laye. Okwe mu udila onghenda, ndele ine mu fila onghenda. Hano naku tye eshi wa udila omunhu onghenda, mu ningila sha, opo u ka filwe yo onghenda ku-Kalunga.

Kalunga oye Kalunga kefilonghenda. Eps.103:8-13. Okwe tu ningila oinima inene iwa. Apa nandi tumbule po imwe. Okwe tu tumina Omwene wetu Jesus Kristus, e tu kulila mefyo nomeenghono dasatana, Tit.2:11-14; 3-7. Kalunga ohe tu tekula noipalwifa yokolutu noyokomwenyo yeendjovo daye. Ohe tu velula ngeenge hatu yehama, osheshi efilonghenda laye ohali kala alushe, Eps. 136.

Jesus Kristus okwe tu fila onghenda e tu ningila sha. A velula ovanaudu, Mark.3:1-12. Okwa nyumuna ovafi vatatu, Mark.5:39-42; Luk.7:11-15; Joh.11:42-44. Okwa twikulula ovapofi Luk. 18:35-43; Joh 9:1-11. Jesus okwe tu kulila nefyo lomomushiyakano, Mark.15:21-37.

Ofye ovanhu vaKalunga, tu filafaneni onghenda ngaashi Omusamaria Luk.10:25:37. Onye ounona nanye yo omwa filwa onghenda kuJesus, fileni yo ovakulunhu veni onghenda moku va yakula moilonga yomake noku va kwata komhango ava ve he wete ko noku va endifa nawa.

Onye oufukwena, fileni onghenda ounona veni, inamu va ekelashi vali komakwena, nomomangade nomoimbodi ile povayeni. Va fileni onghenda mu va nyamife nawa noku va nyangela eendja. Onye ovakwaita nanye yo omwa filwa onghenda kuKalunga ou e li Kalunga keengudu dovakwaita Sak.8:18-23.

Fileni ovashitwa vakweni onghenda. Haku va hepeka vali, hakunyonauna oinima yavo noku va nyeka oinima yavo. Waneni neendjabi deni. Luk 3:14. Onye ovaleli voshilongo eshi, fileni onghenda ounona voshiwana eshi, mu va tungile eefikola da wana, oshiwana shi putuke nawa pahongo.

Mokati ketu Kalunga okwa tula mo owina ovo tava pumbwa okufilwa onghenda; ovapofi, ovafindjala, eehepele di lili noku lili ye a tale nghee hatu di file onghenda. Odi li momikunda detu nomoshilongo shetu.

Tala eetekisti edi tadi landula apa tadi popi efilonghenda eshi tali etele omunhu. Neh. 10:31; Job. 19:21; Omaj.11:17; Hos.6:6; Luk.6:36; Rom.5:11; 30-32; Jak.4:6; Kol 1:6; Heb.12:15; 1Petr 1:13; 2:10; Jes.31:18; Mat.9:13 mokudiinina efilonghenda la tumbulwa meetekisti odo, otadi tu lo-



Omweevangeliste A.Muleka

ngekidile oku ka kala kolulyo laTate Kalunga. Ope na ovanhu vamwe tava nyonene owina vati hinga va ka xupifwa kefilonghenda. Aye, eshi hasho. Tala Hebr. 10:26-31.

Ope na efilonghenda la puka, olo eli pamwe elenga tali velifwa koikunwa nola ya moshipangelo mu he na oikunwa. Nena omupiya walo umwe vati ote li file onghenda noku li twaalela ombike. Eshi epuko. Mokufilafana onghenda, tu tambulafaneni ngaashi Kristus e tu tambula.

Andreas Muleka



Ongundu yaawiliki yaagundjuka ndjoka ya gongalele mOvenduka pehulilo lyaFebuluali nuumvo. Oyendji yomuyo ohaa longo mokati kaalumentu yomahalakano. Kolumoho lela momukweyo gwopokati, omuwiliki gwaawiliki mUushimba, omuyevangeliste Elisa Ndume, a landulwa komuyevangeliste Junias Haixuxwa, Kongo nokonima yaHaixuxwa omuyevangeliste Filippus Weitele

Eso lyuunona waAfrika otali londo

Omumvogu (1986) oshitopolwa sholukadhi lwaAfrika, osha hokololwa sha kanitha uunona 140,000. Ilongo Angola naMozambikwe, oyo unene tayi hokololwa ya gumwa koshiponga shoka.

Pankundana ndjoka ya zi mehanganano lyoonkundana. ZIANA, mepangelo lyaZimbabwe, uunona owa kala tau si momunute omutine kehe kiita nokompumbwe yiikulya omolwomahupilo ga nkundipala. Nuumvo omwaalu okwa tegamenwa gu kale gwa londa pombanda.



Oluvalo lwaAfrika otalu hepa komikalo odhindji. Uuvu wondjala owo oshitopolwa shimwe.

Okwa indilwa ehanganano lyokupalutha uunona lyiigwanahanganano (UNICEF) li yeluthile wo naanona yomolukadhi lwaAfrika oshikaha shekwatho. Pauyelele wa gandjwa kehanganano ndyoka, uunona u vule oomiliyona 15, yokohi yoomvula ntano, miilongo yuushiinda wa SA, otawu hepa nayi konkalo.

Ishewe ehokololo olya gwedha ko lya ti: uunona itau hepa ashike konkalo ndjoka ye etwa po kiita ihe omaluteni, iiponga yiikungulu, engushuluko lyiimaliwa, elondo lyoondando nomapuko gomedhiginino lyiiniwe, mbika ayihe oyo wo tayi nkundipaleke ukolele nuulinawa wuunona moshitopolwa.

MuMozambikwe amuke omahala geyakulo lyo-paunamiti 718 oga hanagulwa po kiita, okuza omumvo 1981, naantu ye vule oomiliyona mbali oya thigwa mombepo yaa na eyakulo. Shoka osha kwatelela mo wo ooskola dhuunona 300,000 dha halakanithwa po. Onkalo ya fa ndjoka osho wo ya holoka nomuAngola, unene mUumbugantu moshitopolwa shono sha kuthwa ko ku SA, koonkondo dhomatati, ehokololo lya ti. Aanashilonga oyendji oya dhipagwa, ya lemanekwa, ye ehamekwa nenge ya kwatwa po ombambyona.

Natango onkalo yoludhi ndoka osho tayi lulumike muZambia, Tanzania, Lesotho,

Botswana naZimbabwe. Oondjila hadhi enditha iiyemo niizemo yaBotswana, Malawi, Swaziland, Zambia naZimbabwe otayi yonagulwa po ethimbo kehe notashi gandja ekanitho enene kiilongo mbyoka.

Mozambikwe ngoka konyala awike e na etulilo lyokupititha mo nokweetitha mo meni lyoshilongo, inaashi guma SA, otaku ti okwa kanitha sigo oompaka ooranda dhobilyona mbali (R2 Bil.) okuza 1980.

Osho sha ningwa mOmutundungu

Pexulilo lomudo 1985 Elelongeleki ola lekela tate M. Nghatanga a shune keumbo eshi kwa li ta yakula eongalo Omutundungu, nole mu pandula molwoudiinini. Eongalo la pewa omulongwafita ou a kala noku li yakula eehani nhatu. Oye tate Elia Namhapo.

Petameko laMaalitsa 1986 Elelongeleki ola kufa po omulongwafita Efa nole mu tuma kOhaukelo. Eongalo la tuminwa omulongwafita umwe ou a kala noku li yakula vali eehani nhatu, oye Daniel Ndemuweda.

Efiku eti 8 Juni 1986 okwa yapulwa ovafita omulongo nOngwediva. Eongalo Omutundungu la udanekelwa tali pewa mo omufita.

Fye otwa li twa hafa unene. Ndele ye kakwa li a fika manga, omolwaashi okwa li ta longekida oshivilohombolo shaye, opo e ye pamwe nomufuko waye. Efiku eti 20 Juni 1986, omufita wetu okwa uluka pamwe nomufuko waye oye tate Linus Dama Shimakeleni nameme Loide.

Ongula yefiku olo, eongalo ola li la ongala nawa. Tete eongalo la ya mongeleka nokonima omufita e ya mo opamwe nomufuko waye. Eongalo ola fikama nola imba eimbilo 431:1-4. Eshi eongalo la kala omutumba, Abraham Haileka okwa fikameka omufita pamwe nomufuko waye.

Okwe va lombwela, omufita wetu okwe u ya. Okwa pula eongalo ngeenge ole mu tambula tuu? Eongalo la nyamukula, Heenojotwe mu tambula nomwenyo aushe. Oponee okwe va leshela muJes.60:1, Tit.2:7-8 noku va lekela va ye moilonga.

Konima yelongelokalunga, okwa ninga oshivilo shinene. Eongalo tali twala omufita walo nomufuko waye keumbo lipe. Okwa li kwa ningwa omikweyo diledile mbali da dja pongeleka da yuka keumbo leongalo omo omufita ta ka kala. Komesho yovanhu okwa li ovakulunhu veongalo, oponee omufita nomufuko tava shikula ko.

Eongalo mondjila ola enda tali imbi omaimbilo ehambelelo. Eongalo okwa li la kumatela okweetela omufita omaano. Eshi twa fika moshivelo atushe eongalo ola kala ofika. I.Kapofi okwa yeulula oshivelo atushe notwa ya meumbo.

Mwinya omwa li oipoiwa ihapu yomahambelelo yovashamene F.Shikongo, I.Kapofi na M.Nekuta. Eongalo ola yandja omaano alo komufita, oponee omufita nomufuko waye ova holola olupandu lavo keongalo. Oshivilo shetu osha xulifwa ku L.Nghidengwa neilikano notwa halakana nombili.

Leena Haileka

+++++

Ehanganano lovapolifi voinheya omulutete laApilili?

Oifonghundana yomoshilongo neudo oya holola kutya Okabinete kepangelo lopakafimbo oke na ediladilo ka dike oshikondo shako kene shovapolifi youndaadi mu SWA. Oshinima eshi osha holoka yo nomoshipopiwa shaNgoloneyandjai kutya ediko lehanganano olo efiku lotete laApilili 1987.

Ovanhu vamwe ova holola nale ombada kediko lehanganano olo moshilongo eshi shoita noshombepo ya kunwa omalimbililafano, kutya itali ka longa mouwa woshiwana, unene mokati kOvalaule.

+++++

Eenghunda pauxupi

Ovakwaita metanga la SA otave limangeleke

Ovakwaita va S.Africa 362, ova kufwa meembale eshi kwa li tave limangeleke omudo wa dja ko 1986. Ovakwaita 48 ova hangika wa pwa mo nale. Osha pitifwa koministeli yeameno, Ndjai Magnus Malan momutumba weyandjo leeveta neudo.

Vahapu vomoonakulimangeleka oonona vopokati keedula 17-19. Inaku shiivika unene oshike tashi twala ovanyasha metokolo li li ngaho, ehokololo otali ti osha pumbwa ekonakono. Ashike ouyelele ou wa konekiwa po oo ou kutya ohashi di yo nomoma-udjuu nomauteku mahapu kounona moukwaita.

Vali omuvalu woonakulimangeleka kemuhapu unene okuyeleka nomuvalu wovakwaita aveshe va SA, chepu la ti.

+++++

Omukifi wolutapo muAfrika

South Africa edina laye ola holoka mokati komadina oilongo yaAfrika 18 omo mwa monika omukifi wolutapo wedina Aids. Eshiivifo ola dja kehanganano loudjolowele mounyuni (WHO).

Ovanhu 2,324 vomoilongo oyo 18, ova monika omukifi ou. Omuvalu u li pombada woonakukwatwa otaw hangika muUganda omo mwa dimbulukiwa ovanhu 766 va kwatwa. MuTanzania ovanhu 462 va kwatwa.

Oilongo ikwao ya ulika omukifi oo oZambia, Congo, Orepublika yaAfrika lopokati, Ivory Coast, Kenya, Ghana, Zimbabwe, S.Africa naMalawi. Omukifi owa holoka yo muLesotho naMozambikwe.

Ekonakono ola ningilwe kehanganano loudjolowele moilongo aise yaAfrika. Oilongo 34 aike ya nyamukula. Oilongo 16 ya nyamukula, oya ti inai kumwa natango komukifi oo muAfrika.

Omukifi woAids ou taku tiwa inau monenwa manga omuti, otawu hepeke unene ngaashi muAmerika nomoilongo imwe yaEuropa. Pakonakono eli la ningwa po fiyo opaapa, omukifi ohau holoka unene mokati komashenge nokeembwada. Ashike ohau kwata omunhu keshe nepupi keshe.

Omukifi ou nande ouyadi mo muAmerika nomu-Europa, Ovaeuropa inava hala nande tau popiwa kutya omo wa mena. Otave lipopile kutya ove u etelwa kOvajafrika.

+++++

Mozambikwe nali lotokelwe onghuwo — eindilo laHamushanga wa UN

Hamushanga woiwanahanganano (UN) dr Javier Perez de Cuellar, eshi a talela po oshilongo shaMozambikwe pexulilo laFebuluali neudo, okwa ninga eindilo kounyuni opo u tondokele oshilongo osho onghuwo yekwafo, kovanhu vasho okudja 1987 fiyo 1988. Moshilongo shaMozambikwe omwa pumbiwa oikulya yeetona 670,000 noimaliwa i dule eeranda eemiliyona 76,6 (76,6mil) omolweemhumbwe domiti, omeva noilonga younamapya.

Oshilongo otashi hepekwa koita yopaukwashiwana omo epangelo tali kondjifwa kovapiyaaneki ovo hava mono omakwafo kepangelo la SA. Ovanhu eemiliyona nhatu odi li paife moluhepo laashishe. Oshilongo ashishe oshi na ovakalimo eemiliyona 12 noixupe pavalulo lomudo 1980.

~~~~~

Omukiintu omudhigu muuyuni okwa li Percy Pearl muWashington, gwomimvo 46. Okwa sile moshipangelo shaMilnainke eti 9 Kotoba 1972. Oshiyelekitho shomoshipangelo moka osha li hashi vihi ashike sigo uudhigu wookilograma 362,8. Ihe Percy okwa li ha vihi ookilograma 399,1 lwaampoka.

~~~~~

Okwa li ku na aamati yaali, okuumathane yopomukunga gumwe, oyo *Sikulyoye* na *Sikulyamukweni*. Aamati mbaka oya li ihaya topoka, naasho ya tameke oskola oya kala haa ende pamwe sigo ya koko ya ningi oomvula 15. *Sikulyoye* okwa lombwele *Sikulyamukweni* kutya mOsoondaha otaa yi komambo. Oyi ilongo po eimbilo 460. Oye li imbi nawa taa tumbula iitya aantu ayehe yu uvite ko nawa. Egongalo alihe olya li lya nyanyukwa keimbilo ndyoka.

Omambo sho ga piti mo, oya shuna komagumbo, inaya pita nando puundingosho, oshoka

Nujoma ta vele eembedi oshiwana shaye

Ombelewa yomayelifilo mehanganano la SWAPO, oya yandja etumwalaka kOvanamibia aveshe tava longifwa kOmutilyane modula ei va hovele okulalakanena ouwa wedu lavo nowoshiwana shavo.

La dja komupresidende wa SWAPO, omushamane Sam Nujoma, etumwalaka oli na omatumbulu amwe makukutu taa holola euditonai omolwoshiwana inashi koneka eshi tashi ningilwa komuhepeki washo.

“Kunye ovo mu he shi eshi tamu ningi mwa twikifwa omesho keliko tali di metiko lohonde yovamwanyoko, nokunye ovo mu li metanga la SWA, moKoevoet (Coin), mEtango nomoupolifi wokwaamenena po epangelo lomahepeko, eembulu oda hala ovanhu vetu ve lilwife vo ve limane po,” osho tali leshwa.

Okwa dimbulukifa kutya eliko olo la ninga vahapu omalai, otali ka xula po nohoni ya kula. Oita yopaukwashiwana ei tai kondjo paife muNamibia, Nujoma okwe i yelesa neembwa tadi lwifwa do di he na eshi de lininga.

“Omwa shekifa oshiwana shOvalaule nye ..., omuvahepeki vovamwanyoko mu dulife nopOvatilyane, opo vati mu fimanekwe kovahona veni. Kamu fifa tuu ohoni!” Osho e va vela eembedi.

Ehepu ola twikila tali londwele komalunduluko mawa taa ningilwa oshiwana opo shi dimbwe osho tashi kondjele. Okwa ulikwa yo kehokwifo loimaliwa mounona wofikola opo va landife po ooxe nooina.

Oubotsotso okudipaa oshiwana, ouhangano veeengeleki dipe tau totwa moshiwana, nouhangano vomaudano novomaxupilo. Ovanailonga vamwe tava pewa ouhona novalihongi vamwe tava pewa oimaliwa ve ke lihongi.

“Naku kotokelwe keshe shimwe sha fa shiwa tashi etwa po, ko ku kotokelwe ovaenda novahona vava tava di kuEuropa,” osho etumwalaka la londwela.

Sebulon Ekandjo

“Ho ende nombudhi nangoye to ningi ombudhi”

shivalelwe ya nwe omafau. Osho ya kala ngaaka nokulongela Omuwa. Sho ya piti ongundu 5 oya topoka kehe gumwe okwa yi koskola yi ili, ihe uukuume wawo opo ngaa u li. Oya kala nokutalelathana po pambapila.

Sikulyoye okwa mono po kuume ke gumwe ngoka ta vulu okunwa omafau nayi moskola e ta dhimbwa esiku ndyo. *Sikulyoye* osho a tameke ngaa ha nu. “Shaashi ho ende nombudhi nangoye ono ningi ombudhi”. Efadho sho lya thiki ayehe oya li ya pita nawa.

Sikulyoye a tameke okukala ta nu omalovu, oshoka e ga uvu uutoye. *Sikulyamukweni* iha nu, oshoka nkene a valwa a nwe. *Sikulyoye* okwa kala e wete mukwawo anuwa omukatalume sho ihaa nu omalovu. Ongula yimwe *Sikulyoye* okwa yi a ka pitule *Sikulyamukweni* anuwa ya ze po. *Sikulyamukweni* okwa pula kutya otaa yi peni, ihe mukwawo ine mu yamukula nando. Sigo ya thiki puundingosho. *Sikulyoye* okwa tameke ngeyi:

Sikulyamukweni: Oshikwashike?

Sikulyoye: Alikana taamba u li lolle!

Sikulyamukweni: Ngame ihandi nu omalovu.

Sikulyoye: Nima nangoye ou li po wi ininga omukatalumwe nkene wa yi

komuhandjo hoka!

Sikulyamukweni: Kuume ngame omalovu ihe nu, tu ye owala mpoka twa adhika tatu yi.

Sikulyoye: Uundingosho mboka u li komeho ou na owala ombike, oto yi vulu ngaa nangoye inoo hala efau ndi lyaa shi elulu, lyo ihaali fike po omapunga?

Sikulyamukweni: Ngame mukwetu iha ndi nu, oshoka ngame okanona koskola. Tu ye owala nondjila yetu kuume kandje.

Sikulyoye: Ngame onde ku eta owala mpaka pu na omalovu omatoye.

Sikulyamukweni okwa taamba ngaa a nwe mo, ihe ina kala e ga uvite omulyo oshoka ke ga shi nale. Okwa kala ngaa ha nu mo kashona sigo e ga uvu omatoye, Ayehe yaali puundingosho ihaa zi po we manga inau pwa. “Ho ende nombudhi nangoye no ningi ombudhi.”

Mvula F. Magano
Nelane Sec. School


Ova kundafana ewiliko mokati kovanyasha mOushimba

Ovalumenhu ve fike 20 novakainhu 2 okwa li va ongala mOvenduka pokati kaFebuluali naMaalitsa va kundafane nhumbi ewiliko li na okuningwa moyoongalele yovanyasha omudo ou.

Okersesa oya li mewiliko lomweevangeliste womOushimba, Elise Ndume. Okersesa yoma-

fiku a vali (28.2 fiyo 1.3.1987) oya kundafana nhumbi omambo oiniwe taa diininwa, ekwatafano lomuwiliki nomuwilikwa, ewiliko leetundimbibeli osho yo omambo amwe oilleshwa yomovanyasha ya ufilwa omudo ou.

Sebulon Ekandjo



Aawiliki yaagundjuka Okahandja naGobabis pethimbo lyokersesa yawo 28.2. - 1.3.1987 mOvenduka


IIPANDAYAAMITI OKANONA KA VALWA MOMAGALIKANO

“Onda kala mpaka omimvo 45 te galikanene osikola yaa teke po mlipandayaamiti. Onda galikana wo olwindji egongalo li dhikwe mpaka. Ngashingeyi ayihe Kalunga okwe yi tsakanithile ndje, onda nyanyukwa shili”.

Omatumbulo oga zi mokana komukulupe gwomimvo 88, omulongi Paulus Haifete



“Tse omuyevangeliste ohatu mu mono momikunda te tu talele po, aakuluntu yegongalo oyo ihaatu mono,” osho aakwanegongalo lyIipandayamiti ya li ya yamukula nemanguluko epulo edhigu kaanashilonga mOngeleki ya ELCIN, uuna megongalo mwe ya etalelopo lyopambelewa. Omuyevangeliste Petrus Shilongo, methano ndika, okwa kuthwa moombudhi kaayakulwa ye.



Ongundu yaanashilonga mlipandayamiti ndjoka hayi viyauka nokuyakula aakriste ooyakwawo 900 megongalo ndyoka

(Kathanga) pethimbo lyoonkundathana dhawo naAmushanga gwoshifo shOmukwetu omasiku ngaka.

Omeho ge taga lesa nawa natango nomakutsi taga uvu ashihe, omukulupe Kathanga okwa kala oomvula 45 molugodhi lwokukondjela osikola yIipandayaamiti yaa teke po.

“Omumvo 1938 sho nda langekwa mpaka omulongi, onda adha po aanona aashona lela nomulongi Sakaria Iindombo, mewiliko lyaalongi Aasoomi megongalo lyaELIM,” osho ta dhimbulukwa natango.

Okwa tsikile ta ti: oya ka luka ndje “Okakwanyama ka tseyu,” oshoka uunona onda li handi ke u hehela aavali momagumbo, opo u ye kosikola. Osha li sha kwatha eindjipalo lyosikola.

Iipandayaamiti, mbyoka ya lukilwa aniwa omusamane gwomunahambo, Omungandjera Amiti, ha gondjo momiti dhomipanda, olya kala wo oshitsa shopokati komakondjithathano gomonakuziwa pokati kuukatoolika nuukwaevangeli.

Aanasikola yaKathanga ota ti oya kala haa kakelwa moondjila nuuleke kaalongi yaKatoolika mboka ya li ya tungu osikola yawo uule wokilometa yimwe ayike okuza mlipanda ya ye kosikola yawo. “Komukalo nguka, oye ndji onde ya kanitha”, osho mukulupe a he mpulula nomadhimbulukwo goluhodhi. Ihe oluhodhi okwe lu dhimi po nomatumbulo ngaka: “Kalunga na hambelelwe ngashingeyi sho tu na uushiinda u na ombili.”

Palunza lu shi okwiinekelwa, osikola ndjoka oyi na nuunvo aanona konyala 800, okuza Sub A sigo Std 6, Aakatoolika nAaevangeli. Aalongi 26 mewiliko lwomukuluntusikola Omukatoolika.

Pomimvo 1960 nenge 61 omuhokololi ota ti opwa li natango onkambadhala yomutalelisikola




Omulongi omukulu mlipandayamiti Kathanga ngoka a kondjele egongalo li holoke po.

“Burger” okudhima po osikola ndjoka. Omusamane Kathanga kekwa wo lyomuhongi Erikki Hynonen muElim, nasho inashi pita.

Omwedhi gwa yi sho nda ka thikamena amatungo gosikola ndjoka, onda vulu okulesha nuupu elongelokumwe lyaalongi naanona yawo, osho wo lyaalongi naavali, ndyoka lya teka pomahala gamwe moshilongo shika.

Omatungo omakulu nomape otaga monika ge li monkalo ombwanawa lela. Mpeyaka pooh dhosikola onda adha po etungo epe lela lyekuma niipeleki, opo lya tameke iilonga. Kuuzilo walyo nokuuninginino okwa dhengeiwa omala giipeleki agehe kumwe gane.

Onda lombwelwa komwiinekelwa gumwe posikola ndjoka, kutya shoka osho iilonga



Omusamane Nikanor Andreas oye a pewa uunkulungu wokutungu oongulu nohe shi ningi neiyambo enene


yiikaha yaavali yo yene yomomudhingoloko ngoka, ya hala uunona wawo wa longwa. Noyi ipyakidhila natango okugwedhela po omala omakwawo.

Osha dhimbulukitha ndje ehambelero lyomukulupe Haifete, okupandula uushiinda

wawo. Osha tompele ndje wo nkene ethimbo lya pya, oshigwana kaashi ligamene we kiipala yAatiligane okupewa oompumbwe dhelongo lyuunona wawo.

Okuza 1983 osinagoga ndjoka yIipandayamiti oya dhikwa ondjakulwambinga yegongalo lyaElim, palongekidho lyomusita Eino Amaambo. Okuza Juni 1986 Elelongeleki oya langeke mo omusita a zi kOngandjera, Jason Mbadhi, hakulitha we iimuna ye mwene, ihe oomwenyo dhooitaali, payalulo lyomumvo ngoka (1986) ye thike 946.

Omugundjuka lela palutu nopawino yoshilonga shopausita. Oonkondo dhoshigundjuka noompangela dhe dhowino yomelongo ina mona manga ethimbo oku dhi lola noku dhi longitha.



Etungo ndika lyosikola olya hololwa po kaavali yo yene, aanona yawo ya longwe



“Omaluvalo nomaluvalo otaga ka lesa ehistolli ndyoka to tungu miilonga yegongalo ndika, uudhiginini woye otawu ka simanekwa monakuyiwa, osho omukwathi gwomumbisofi M.Amadhila a lombwela Amushanga moshinyanga, Roswindis Mateus pethimbo lyetalelopo.

Ethimbo lye mu yeleka okutula ayihe mbyoka miilonga olyo alike ngiika tali ka yamukula epulo ndyoka lya thikamena ishewe egongalo ndyoka, ngele oli na okutsikila nenge otali dhimwa po.

Epulo ndyoka itali zi we mekondjithathano lyomaitaalo ga yooloka. Ngashingeyi omushono omusita omugundjuka e shi koneke kutya egongalo otali hepekwa kombepo yuukwamuhoko omolwoongamba dhopokati kiilongo. Uulodhi aakriste otaye u inekele ngiika noopelesenda 95%. Egongalo otali nyengwa okugandja ondjambi dhaanashilonga yalyo.

Etalelopo lyopambelewa lyOngeleki megongalo ndyoka mewiliko lyomukwathi gwOmumbisofi, olya li lya pulakene noluhodhi iinima mbika mehokololo lyomusita Mbadhi.

Etalelopo olya li ko okuza 20-22.2.1987. Okangundu kaakriste mboka ye li po natango ekondjo ndyoka, nako oka pulakene noluhodhi, ko inaka patana ehokololo lyomusita.

“Tangi sho mwe ya mu tu kwathe muudhigu wetu, Kalunga na pandulwe sho mwa thiki mu tu tye ishewe omukumo,” osho oyendji yomegongalo ndyoka ya holola omaiuvu gawo kaayenda yetalelopo.

Pamwe nomukwathi gwomumbisofi metalelopo omwa li omutonateli omupeha moshitayingeleki shUuningino, omusita Johannes Shifiona; omusita Festus Ashipala, omusita Matti Endjala naAmushanga gwOmukwetu.

Egongalo Iipandayaamiti oli li ookilometa konyala 40 kuumbangalantu waElim, ookilometa konyala 30 muumbugantu wOlupandu nookilometa ngiika 25 muuninginino lela wEndola. Euvathano lyoongamba pokati kegongalo ndyoka nOniimwandi osho wo nOlupandu inali ningwa natango. Egongalo olyu ulumikwa li shi ninge mbala.



Omusita J.Mbadhi ta tungu egongalo nelaka etoye



Etalelopo sho lya hulitha iilonga yalyo, omusita Jason Mbadhi nomufuko gwe Magano, oya li taa fudha omufudho gwemanguluko lyoshimpwiyu oshinene shaayenda sha piti po. Mbala ishewe otaa ka tsikila nokutula egongalo miilonga yaashono lye shi thigilwa ketalelopo ye shi tsakanithe.

“Ngele mwi ilwete mwa ndopa, osho shi na okukala manga tu li kevi. Ngele itamu si uunye, ekondjo lyeni otali ka adha kethikilo li na ondjambi, niyimati yiilonga yeni itayi gwile pevi,” osho omukwathi gwOmumbisofi Amadhina a kumike egongalo omukumo, pehulilo lyetalelopo.

Okwe li pandulila wo iilonga yalyo iiwanawa ngaashi etungo lyongeleka, negumbo lye-gongalo moka lya langeka mo omusita gwalyo.
Sebulon Ekandjo

Omuwiliki wa SWAPO a yadja eudaneko ketwikilo loshilonga shOngeleki muNamibia la mangeluka

Keshivo la dja kuHamushanga wOngongahangano yOvakwaluther mOunyuni (LWF) omundohotola Gunnar Staatsset, omutumba owa li wa ningilwa muGeneva muFebuluali 16, 1987 pamwe nomupresidende wo SWAPO Sam Nujoma nosheendo shaye.

Eengeleki domuNamibia oda li da kalelwa po moshongalele eshi komubishofi Kleopas Dumeni wa ELCIN, Omubishofi Hendrik Frederik wOngeleki Onkwaevangeli paLuther



Amushanga gwEhangano lyAakwaluther dr Gunnar Staatsset

muNamibia (Etumo laRheinish), Omubishofi Bonifatius Haushiku waKatolika kaRooma nomufita Abisai Shejavali Hamushangandjai woraata yeengeleki moNamibia. Oshongalele osha li sha tameka nouvalelo uyapuki pamwe novanambelewa monhele oyo youkumwe weengeleki.

Hamushangandjai wOngongahangano yOvakwaluther mOunyuni mokuyeyulula omutumba ou okwa ti, ye ota yelifa omatokolo oshongaleleengeleki sha LWF oshitiheyali muBudapest 1984, naimwe ya landula, yokomitiye omhitifi ya LWF momido (1985,1986). Oyoongalele oya koleka omakotamhango eengeleki pamhepo youkriste okukondjela emanguluko laNamibia.

Ongongahangano yOvakwaluther mOunyuni (LWF), oya endulula omaudaneko ayo okutwikila oilonga yayo okuyakula ovanhu vaNamibia meni nomoupongekwa, mokukonga omukalo tau eta ombili nelifikameno laNamibia melongelokumwe no SWAPO, oyo i lile po ovanhu aveshe vaNamibia, osho ehokololo la ti.

Oshongalele ashishe osha kolekulula okatokolifo 435 (1978), kutya oko ashike ke li omukangha wokweeta po elifikameno, ombili nemanguluko laNamibia.

Ongongahangano yOvakwaluther noilyo yayo yeengeleki, sha pamba koolongo yavo, oya udaneka okutwikila okuyandja evatelo lopamhepo nopaemhumbwe dokolutu kuNamibia la mangeluka tashi pitile meengeleki domoshilonga ngaashi tadi twikile okukala eengeleki dopaukriste moNamibia.

Pomhito ei, Omupresidende Nujoma naye okwa shilipaleka ovawilikingeleki, kutya oshinakuwanifwa shongeleki yopakriste muNamibia la mangeluka otashi ka twikila natango.

Ongoshitopolwa moilonga yayo, ongongahangano oya kolekulula kutya oye lilongekida okuyandja eenhele doushakeneno (weenghunda-fana) okweendelelifa emanguluko pamukangha wokatokolifo 435 koiwana ya hangana.

Metwokumwe loilyo yoshongalele ehapu otali ti kutya ombili, ouyuki noufemba womunhu oyo oshilalakanenwa omo eengeleki, Swapo nOngongahangano tava shakene.

Kefatululo longhalo kwaavo ve li moupongekwa, Ongongahangano oya ulika nghene ye lilongekida okutalelapo eekamba

deenhauki dOvanamibia. Omupresidende wa SWAPO oye mwene a shiiva Ongongahangano i talele po eekamba.

Ehepu ola twikila tali ti: kombinga yelipulo lonakwiiwa yOvatilyane moNamibia, oshinima osha yelifwa mokatokolifo 435 kOiwana ya hangana omo mwa pulwa ehoololo la mangeluka laaveshe mepashukilo nomewiliko lOiwana ya hangana, osho tashi twala melifikameno laNamibia.

SWAPO oya ti aveshe Ovanamibia moNamibia pe he na ondjoolola yoluvula, oukwamuhoko ile eitavelo, aveshe otava ka tyapula oufemba u fike pamwe.

Oshongalele ashishe osha koleka neenghono omaindilo eengeleki eshi tadi indile omahangano nomapangelo mounyuni a ninge onghendabala keshe mokweendelelifa okuxupifa ovanhu vaNamibia memono loixuna nomefininiko omo va kala eedula dihapu. Aveshe moshongalele eshi ova holola okutomhelwa kwavo, kutya efiku lemanguluko lovanhu vaNamibia otali ya diva.

(NCC)

Eholokepo leongalo Omutundungu

Omutundungu omukunda u li lela mouninginino woshitaingeleki shaUkwanyama, meongalo Okalongo. Ofye ovakali mOmutundungu otwa kala alushe nokweenda eendjila diledile okuya kelongelokalunga, nosha li she tu lolola neenghono. Omwene Kalunga tate okwa tala eloloko letu nokwa uda ovakalimo.

Pexulilo lomudo 1984 omupashukilishitaingeleki shaUkwanyama, A.Kaulinge okwa talela po Omutundungu nokwe tu etela onghundana iwa tai ti: Omutundungu otau ka dikwa eongalo, otwa li ne twa hafa unene.


Efiku eti 6 laJanuali 1985, otwa li ne tu na oshivilo shinene sheongalo lipe tali dikwa mOmutundungu. Otwa mwene ovaenda vahapu va dile keembinga neembinga ve uya kediko leongalo lipe. Ongula yefiku tuu olo potundi 9.30 ovanhu ova li va tulwa momikweyo diledile tava yuka kongeleka. Eshi pwa yeululwa, ovanhu ova mbolokotela mo vamwe va kala pondje, osheshi mongeleka itava wana mo.

Onda li nda kumwa unene mokutala ovanhu vamwe tava kuwilile, vamwe otava dana, vamwe otava imbi navamwe otava pandula eemhandu.

Omupashukili okwa popifa eongalo ta ti: "Onye Ovamutundungu omwa kala nokweenda eendjila diledile okuya kelongelokalunga kOnandjaba. Paife omwa pewa eongalo leni lipe nongeleka yeni vene. Li diinineni hano mu he li nyekwe nande okomunhu." Ovayakuli vaye va lesa amatumbulo omOmbibeli paxupi.

Moshuudifilo omwa li mwa fikama omufita F.Shikomba, ou a udifa otekisti yefiku olo. Eengudu domalwiimbo da imba omaimbilo ehambelelopandulo notwa li twa uhala momudimbi tau talaleke nawa eemwenyo detu. Opwa li yoo oipopiwa ihapu kovapopi ve lili noku lili ngaashi omushamane Mateus Hedula ou a eta ondjokonona nghe Omutundungu wa holoka po, nokwa ndjokonona ngaha ta ti:

"Omutundungu owa kelwe po momudo 1933 kovakulunhu vavali ovamwainafana Jakob Hedula naJosef Hedula novakulukadi vavo nounona vavo vahamano. Tate Mateus Jakob okwa



Omushamane Abraham Haileka

holola kutya ova hangele po ofuka inene mu na oifitukuti ihapu, eenghoshi nomambungu, paife Omutundungu owa ninga eongalo nokwa xulifa ta ti: "Kalunga Tate na hambelelwe shili."

Omushangi wehepu eli a eta po ebandulo ponhele yeongalo kovaenda aveshe ovo ve ile koshivilo va dile komaongalo nomaongalo nokwa xulifa netumbulo eli:

Omwene efimano li ha ninge letu, ndele oledina loye liyapuki nola fimana. Oshivilo shetu osha xulifwa nenangeko noupuna komupashukilishitaingeleki Kaulinge notwa halakana nombili.

Abraham Haileka

EPANGELO LYOPOKATI OLYA HALA OKUHIYA MO OKANDAMI MOKANA

Osha fa epangelo lyopakathimbo mOvenduka omasiku ngaka opo li idhimbulula lwotango kutya okandami ke li tulwa mokana kepangelo lya SA, kake na nani omahini. Ishewe onkambadhala yoku ka hiya mo oya lukwa kuyamwe yopondje kutya "okwiika koshitayi wa londa ko."

Oongundu dhimwe dhopapolotika mepangelo lyopakathimbo odha gandja ehogololo kuNgoloneyandjaji gwa SWA, a shune ku SA nenge odho dhi ze mo miilonga. Omatumbulo oga zi mevonayi lyoshipopwiwa shaNgoloneyandjaji Louis Pienaar, meegululo lyomutumba gwotango gwokomumvo 24.2.1987. Omukalelipo gwepangelo lya SA okwa li a dhimbulukitha epangelo lyetaaguluko nomatumbulo gamwe ngaashi taga landula:

- * Nashi kale sha yelega kehe gumwe kutya Ngoloneyandjaji mu SWA oku li mo omukalelipo gwomupresidende gwoshilongo sha SA, onkene ita imangeleke kumwe nomahalo gongundu yontumba nenge ogembwinda lyoongundu dhontumba.
- * Orepublika ya SA itayi dhimbakanitha nando chalo lyoyendji yomoshilongo naandyoka

lyepangelo lyetaaguluko.

- * Oshilonga shandje ngaashi nonale wo, ote tsikile okukwatathana naawiliki yoongundu dhilwe wo dhopapolotika, nohaandhoka adhike dhomepangelo lyetaaguluko.
- * Ehogololo lyaayehe moshigwana tali hindi eendathano lyopondje na SA, itali ziminwa nando. Ehogololo tali popilwa olyopamavi-gumbo.

Oshipopiwa shomunaveta Pienaar osha li shi ikwatelela unene komathaneko ga ningwa po kepangelo lyetaaguluko, ngoka ga lukwa "Omu-mvo gwiilonga 1987". Mugo omu na:

- Edhina Namibia li taambwe ko noli longithwe paveta.
- Pu kongwe eimbilo lyopashigwana sha manguluka nepandela lyoshilongo.
- Omadhina gomahala ga lukululwe.
- Pu dhikwe iikondo iyali; oshikondo shomeni, shoka oministeli yasho tayi kala yi na sha naakwiita ya SWA ashike, osho wo aapolosi.

Oshikondo oshitiyali oshomalongelokumwe niigwana nomapendulopo.

- Aakwiita ya SWA ya yooloke kumboka ya SA, opo ku monike etanga lyopashigwana.
- Okabinete ka popye peha lyoshigwana uuna ku na oonkundathana niilongo yopondje omolwa SWA.

Moprograma yiiningwanima yokabinete muule womumvo nguka omwa thanekelwa wo pu kongwe yamwe ngoka ta kalele po SWA muuyuni. Ehogololo lyoshigwana ashihe muukumwe nopo kongwe oombapila dhuuthemba dha SWA lyo lyene, peha lyaandhoka dha SA dhi li melongitho.

Epangelo ndyoka lyopaumwene olya hala natanango okutala nokudhika iiyelo ya SWA, yokupita mo nokuya mo, yi li metonatelo lyaakwashigwana yoyene.

Kombinga yekotampango lyoshilongo ndyoka lyi ipyakidhilwa nalyo ngashingeyi okutungwa, uuna lya pwa, li gandjwe moshigwana ashihe, opo shi holole ewi lyasho kulyo.

Mokuyamukula kiitsa mbyoka, konyala shimwe nashimwe, omukalelipo gwa SA mu SWA omunaveta Pienaar okwa londodha ongundu ndjoka ya talwa koyendji moshigwana, kutya aanashilonga ya SA neyamukulo lye okwe li pandulilwa komupresidende gwe, omusamane P.W.Botha.

"Nashi kale sha yelega kehe gumwe kutya Ngoloneyandjaji iti imanga kumwe nomahalo gongundu yimwepo ashike nenge gembwinda lyoongundu dhongandi. SA okwa hala okuwili- kwa kehalo lyoshigwana, naashoka opwa dhiladhilwa ehala lyoshigwana ashihe," osho Ngoloneya a ti.

Kombinga yedhina Namibia ndyoka tali hogololwa, omusamane Pienaar okwa ti iinima mbyoka kayi shi okutokolwa kokangundu okashona, ko ke yi thiminikile oyendji yomoshigwana, omukalo ngoka hagu pendutha omahan- nyuko omadhigu taga fala momatopauko.

Okwa pandula onkambadhala ombwanawa tayi ningwa kOkabinete opo ku monike epandela lyoshigwana neimbilo lyalyo, shimpa ashike napo tapu kotokwa ku monike ethano ndyoka tali kwatelele mo omihoko adhihe nomithigulu- lwakalo dhoongundu adhihe.

Sho a ka thika moshitsa shedhiko lyiikondo, okwa ti kamu na epuko lyasha mokulongekidha iinima mbyoka nando ethimbo inali pya, ashike ota londodha kutya oshilongo itashi manguluka nando, okuninga pwa uvathanwa tango euva- thano lya kwata miiti Aacuba ya ze mo muAngola. Uunainaashi ningwa, SA oye e na okukala ta ti piii.

Dr Pienaar okwa tsikile okuyelitha oshinima kutya, etopolo lyomatanga ga SWA kungoka ga SA, otashi pula oonkundathana dha dhindwa nawa, opo shaa yonagule omuthika gwevi (status) momemo guuyuni.

Osha konekiwa kuyamwe mboka ya kala popepi niilyo yOkabinete, kutya nani oya kala neuvoko aniwa omupresidende P.W.Botha sho a gandje- le oveta yedhiko lyepangelo lyetaaguluko, ka li a **dhiladhila** pu kale andola omangambeko goku- **gandja** oonkondo kongundu yepangelo lyopaka-

Omutoti gwegongalo Haifete mlipandayamiti

"Oshilonga shetu mpaka osha kala unene okulonga osikola yaanona, oku ya longa oondanda neshasho," osho omukulupe Paulus Haifete ta hokolola etameko lyegongalo, lipandayamiti ndyoka lya dhikwa ngashingeyi konima yoomvula ndatu.



Omudhiki gwegongalo Paulus Haifete

Omukulupe Haifete gwomimvo ngashingeyi 88, okwa ti haye omudhiki gwasikola plipandayamiti. Okwa landula muule wethimbo efupi omudhiki gwehala ndyoka Sakaria Iindombo.

Pahokololo lye mwene tatekulu Haifete nando e na edhina lyOshikwanyama nokwa lukwa Okakwanyama kashiinda she, omvatelele naanaa yUukwambi. Omumvo 1920 sho a shashelwa mUushimba, mokugalukila kegumbo, ina tsa we yo ya thithe nomukwaniilwa lipumbu Tshilongo omoluukriste we.

Omumvo 1924 okwa tidhwa mo moshilongo, pamwe nayakwawo aamati yahamano e ta tembukile kUukwanyama mOnekwaya yaNdapona. Hwiya okwa thikile pomulongi Wilhelm

Kafita. MOnekwaya okwa landulile mo hekulu Namboga yaKasita, naye a luwa ekumbu komukwaniilwa lipumbu molwondumbo ashike yonkalathano.

Omumvo 1925 Haifete okwa tameke osikola yaamati mEngela moka a kala sigo 1927. Sho a piti mo okwa tumwa a ka longe osikola mOshimwaku. Egumbo lye olya kala mOngudi. Omumvo 1935 okwa ka tsikila Oseminali yuulongi kOniipa. Sho a piti uulongi 1937 opo ihe okwa tuminwa a ka pendule po okasikola komlipandayamiti.

"Onda adha po okasikola okashona lela noma- gumbo taga yalulwa. Iilikama niyamakuti oya li yu udha po ethimbo ndyoka," osho omukulupe ta dhimbulukwa natango etameko lyomukunda ngoka.

Omumvo 1960 etokolo olya li lya ningwa komutaleli Burger osikola yi edhilwe po, oshoka aniwa oya nkundipala. "Otwe yi kondjele naAmushanga gwoosikola ethimbo ndiyaka nakusa Isak Kasheeta naatumwa Aasoomi muElim," osho a hokolola mwene.

He yaanona 11, Haifete, oku li ngashingeyi moshipundi shevululuko, ihe omuuvithi natanango megongalo lyawo, nomayege ge otagi inekelwa koyendji sigo onena megongalo.

"Ehala onde li galikanene osikola yalyo yaa teke mo, noli mone omusita gwegongalo, ayihe Kalunga e yi gwanithile ndje, Na hambelelwe, osho a tumbula nenyanyu olindji.

Sebulon Ekandjo

Tala kepanja 11

A mangelulwa mondholongo

Omusita Junias-Vaino Kaapanda, Tshandi

Ya dhigininwa natango

Titus Shalimba naWilika Ainima pamwe nokanona kawo koomwedhi mbali, mOnakayale.
Mirjam Filippus, Nakayale
Elizabeth Amukwaya, Nakayale
Ruben Edmund, Anamulenge
Konis Shoombe
Nestor Tobias
Lamek Kadhila
Isak Shoome, Tshandi
Eva Shaningi, Tshandi
Absalom D. Nuugulu, Tshandi
Abner Lukas, Elondo
Taimi Endjala, Etilyasa
Abraham Shivute, Oluteyi
Josef Katofa, Eengolo
Katofa Shilongo, Eengolo
Samuel Andreas

OLUHODHI MOLWIKOLITHA

Ngame ondi hole okulesha Omukwetu nOmukuni, ihe ondi na oluhodhi olunene sho aluhe te tsakanene mo yamwe yomoshigwana shetu taa longitha nayi iikolitha. Yamwe yomuyo aalongi naalongwa.

Napu ningwe oonkatu dhokungambeka elongithonayi lya tya ngeyi, nenge ano ongiini? Ihadhi gwanene omutse gumwe.

Titus A. Abniel

Kaunda ta papida ku SA eenghundafana de mangeluluko laNamibia

Efimbo lokafilu kenyanene mounyuni okumwenena elipulo nhumbi Namibia li na okumangeluluka, ola iwa omafiku aa



Omupresidende S. Nujoma nomupresidende K. Kaunda

OVA SHANGELA NGE TAVA TI

Onda ulikilwa oivadi yekondjelomangeluluko

Onda li moshongalele shotete shokodula 31.1.1987 kOvenduka shoSWAPO ile ndi tye shovakondjelomangeluluko Ovanamibia. Okwa li ngoo nda ka talela po nomafiku e li 6 opo ndi shakene noshongalele. Okwa li nda ifana vakwetu vamwe opo tu ye koshoongalele.

Ova ulikila nge oivadi yeembwa dopolifi domomafiku 30.11.1986 omo mwa fila yo hailwa Shifidi. Onda hala ku ku lombwela ngaha, ame onda ya. Eshi nda aluka koshiongi ohai pulwa eshi sha tongwa ko. Onda nyamukula ngaha eshi nda pulwa: Omunamibia keshe fila Namibia loye, ino filwa ko kumukweni.


Onda hala kutya ngaha, ino teelega u file edu limwe li he fi Namibia, natu li dipaelweni. Oku na ovanhu vahapu meedolongo fiyo opaapa tava kondjo ve shi kutya oli na oku mangeluluka.

Ila hano u kondje pamwe nOvanamibia vakweni. Eeranda omayovi dokukengelela di fiya po. Efa ekengelelo, litula mo SWAPO, omu na ouwa washili.

L.K.Hadimbo
Tsumeb

Nuumvo kuthii ko oongaku koompadhi

Ondi na eindilo kaailongi amuhe Aanamibia mboka mwa mono ompito yokukala miipundi



pokati komupresidende waZambia, dr, Kenneth Kaunda. Omupresidende Kaunda okwa papida kepangelo la SA li tambu-

yoskola, naamboka wo ta mu ka kala mo komeho, opo mu longithe ompito ndjoka narwa.

Opo u ka teye eteyo ewanawa, kuna nuudhiginini. Sha hala kutya, longitha ethimbo lyoye narwa. Li kwata narwa ngaashi okanona ka mangela osipenitha mokakaiwa kaayi kane.

Ethimbo lyokudhana nali kale efupi. Lyokulesha nali lelepale. Tamekelapo iilongwa ayihe petameko. Ino etha iilongwa yi ku ndumbalele, ito ke yi vula. Endulula iilongwa yoye manga ekonakono li li kokule. Ngele owa kambadhala ngeyi, oto ka ninga omusindani.

Mr Deevy-Angula yaAngula
Ondangwa

Oshipango shovanyasha

Luhapu otwe shi uda nge ovakulunhu vetu tave tu ngongotele omolwokuhadulika kwetu, nge moilonga, nge momikalo detu. Vahapu otwa dimbwa kutya okwa kala oshipango oshitine, osho tashi tu lombwele:

"Fimaneka xo nanyoko, opo u kale u na elao nomwenyo mule kombada yedu". Dimbulukwa kutya osho oshipango shi na elao nomwenyo mule. Ohandi ku indile omuleshi u shi wanife opo u kale u na elao.

Ewanifo loshipango eshi, ha ngeenge ashike ho kundu ovakulunhu to ti tate ile meme, ndele ongeenge to lundulula omikalo doye dii ndele to

Kepandja tali landula

le ko eindilo lomupresidende wa SWAPO, omushamane Sam Nujoma, opo va ye meenghundafana diva.

Ondjuulufi yomushamane Nujoma va popye nepangelo la SA oya kala po alushe nokwe i endlulula ohani ei padjonghundana yaZambia. Omupresidende Kaunda okwe li yandja yo meyakulo eli a ninge omupokati meenghundafana davo.

"Eenghundafana otadi dulu okuningilwa ponhele keshe nefimbo keshe" osho omupresidende Nujoma a udika ta popi koradio yaWashington D.C. Nujoma natango okwa tiwa okwa ekelashi emangeluluko laNamibia li kundafanwe kumwe nOvacuba tava kwafa epangelo lOrepublika yoshiwana shaAngola, osho yo ina itavela emangeluluko e li kundafane nepangelo lopaumwene mOvenduka.

Omudo 1984 onghendabala yeshakeno lo SWAPO nepangelo la SA oya ningilwe muLusaka, nakeshe ombinga oya dile mo tai yandja oushima kuikwao, kutya oyo ya nyona eenghundafana. Ngoloneyandjai wa SWA pefimbo linya, dr. Willie van Niekerk nomupresidende Kaunda, ovo va li ovanashipundi sheenghundafana.

Fiyo opefimbo oshinyolwa eshi tashi i menyanyangido, epangelo la SA okwa li inali kumbulula epapido lomuleli waZambia, eshi taku tamekululwa natango okukonga omhito yeshakeno.

Pamwe neindilo eli omupresidende Nujoma okwa indila yo ounyuni u shile wa nghena kokangodi kondjidikila ku SA, ngeenge nani ina hala okuya mo meenghundafana.

Sebulon Ekandjo

OKOMBONI YAKATUTURA OTAYI KA PATA MUSEPTEMBA 30, 1987

Omiyelo dhokomboni yAawambo mOkatutura, mOvenduka sho tadhi ka edhilwa po, opo ku tungwe omahala omape, ombelewa yehangano lyomatungo oya tegelela omaindilo gaayehe mboka kaaye na mpoka taa ka kala, ga thike manga 18 gaMaalitsa 1987 inaaga thika.

Etseyitho ndyoka lya zi mombelewa yehangano lyomatungo moshigwana (National Building and Investment Corporation/NBIC) olya ti okomboni otayi ka hulitha po okweedhilila oonakukala mo okuza 30 gaSeptemba numvo.

Ehangano olya ti wo kutya iimaliwa mbyoka hayi futwa kaahona omolwokulongitha ehala ndyoka kaaniilonga yawo R102, otayi ka hulithwa po okugandjwa muAguste 1987.

Pauyelele mboka wa gandjwa moshinima shika, okomboni ndjoka oya li yi na okupatwa nale nokuli omumvo 1985 naishewe muKotoba 1986. Aahona yiilonga oyo yene taa tala aantu yawo kutya otaye ya kaleke peni nenge ya tseyithe uunyengwi wawo kombelewa yehangano lyomatungo.

Okomboni ohayi longithwa kaaniilonga unene mboka ya zi kuumbangalantu woshilongo ye thike lwopo 10,000, palunzankundana kaalu shi unene okwiinekelwa.

Sebulon Ekandjo

Dha za kep 1.

mwa ti tuu etanga lyegameno?, Osho omukulupe gwomimvo tadhi tengenekwa po 68, Viktoria a kala ta pulile mo mboka ye mu gongalela.

Pakudhimbukwa kwe, ota ti Aatiligane yatu sho ye eta omusamane gwe megumbo, gumwe okwe ya e te mu nukile niivugati mbyoka ya li tayi dhengithwa omusamane. Okwa ti sho a gwile po komadhengo, okwa lyatwa natango noongaku, sigo kwa zi Omuluudhe gumwe a takumine Oshilumbu, opo ihe she mu etha.

Konima sho ya ka godhipukwa, oya dhimbulula oondjuhwa dhawo mbali megumbo odha yahwa dha sa, pe'ugo omasiga oga tatulwa po. Oya kundana wo kaashiinda yawo kutya ongombe yimwe puushiinda nayo oya yahwa okusa manga yi li koshipululo.

Opwa piti konyala ootundi 24, oonakudhengwa mbaka sho inaa monenwa osheenditho oku ya thikitha komiti, koshipangelo. Ayehe yaali oyu uvite nayi komwenyo sho ya dhengwa yaa shi e-yono lyawo.

Pahapu dhomupopi gumwe kaadhi shi unene okwiinekelwa, epya lyoonakudhengwa nosho wo galwe, oga lyatagulwa po kiihauto yaakwiita. Egumbo nepya lyoonakudhengwa oya thigilwa ashike ngashingeyi metonatelo lyokakadhona okashona nomukulupe oshilema nomunahambo ngoka a kala mo.

"Otu na owike megumbo lyetu mumati gwandje," osho kuku Viktoria ta hala okusa omuti- ma okudhiladhila a kalela oshipangelo miinima yaa na mutse nandungu. Otaa ipula wo ngele iita oyo ye yi eta moshilongo muka.

Sebulon Ekandjo

Omahalelo omawanawa

Otandi halele omuwiliki gwoprograma; Kalunga kehekeleko alihe, omayambeko gaTate Kalunga. Ne ku gwedhele ko oonkondo okuwilika oprograma yoye, na zimine omagalikano goye sho to galikanene aantu omolwoothina dhawo. Aanyoli nane wo otandi mu kundu. Eps.133. Nampongo ne mu pe wo oonkondo miilonga yeni.

Tangi mwaayihe

Simon Itewa

OKANDAMI MOKANA KEPANGELO

thimbo. Oshipopiwa shaNgoloneyandjaji osho ashike she ya kutha mopwiki.

Ewilikongundu lyoshigongi sho DTA, olya holola aniwa omadhiladhilo galyo kutya lya lya vulwa okukala aluhe oshilongitho miikaha yayalwe. Inali tsa kumwe nomadhiladhilo gaNgoloneyandjaji, ehogololo li ningwe ashike pamavigumbo moka aawiliki yolela ye na okumonikwa. "Shoka otashi ke tu dhinitha aluhe koshigwana", osho lya ti.

SWAPO-D ngoka pashifonkundana Windhoek Observer, oohapu dhe odha kolekwa wo nokopaati ya SWANU, mewiliko lyomusamane Moses Katjiuongua, okwa ti, ngele Ngoloneyandjaji ita shuna kaandjawa ku SA, nena epangelo lyetaaguluko olyo nali thige po iilonga.

Oopaati ndhoka mbali, SWAPO-D na SWANU, odha tala ko oshipopiwa shomusamane Pienaar kutya oluhindo, eshundulo lyepangelo lyetaaguluko momemo guuyuni, osho wo meni lyoshilongo. Oshipopiwa, oya ti osha gandja wo ezimba ewinayi pokati kombelewa yaNgoloneyandjaji nepangelo lyopakathimbo.

Pamalunza gamwe goonkundana moshilongo, Ngoloneyandjaji sho a tegelela oongundu dhilwe wo dhopapolotika dhi kuthe iipundi mepangelo lyetaaguluko, opo elelo ndika li talwe ko li lilepo oyendji yomoshilongo, okwa ligamena omeho kongunduleli yevigumbo lyAadamara nokongunduleli yevigumbo lyAawambo.

Mokana ke Dr Pienaar okwa ti, oku na aawiliki yamwe mu SWA ya simana kaaye li natango mepangelo ndika. Onda tseye wo nkene pe na etindo lyokutaambathana nuusama mboka itau talemwa ashike kepangelo lyopakathimbo.

Okwa tsikile ishewe ta ti opo oonkondo dhepangelo ndika dhi nenepekwe lya li kalele po

dimbwa bo oilonga yoye aishe ii, ndele to liufa koipango yaKalunga, nena oto ningi omunelao. Efes.6:1-13: Heb.13:17.

Gerson Haikali

Taambathaneni ngaashi Kristus e mu taamba okusimanekitha Kalunga

Koshigwana oshiholike, omumvo nguka 1987 mu ELCIN alihe ogwa pewa oshipalanyolo shika: "Taambathaneni ngaashi Kristus e mu taamba okusimanekitha Kalunga, ngaashi sha nyolwa mu Rom.15:7. Onkee ano aakwashigwana atuheni, tu taambathaneni opo tu kale nombili moshilongo ashihe. Tu taambathaneni ano opo tse tu kaleni nombili yomonkalathano yetweni aakwashigwana aaholike.

Esilohenda lyOmuwa gwetu Jesus Kristus nohole yaKalunga Tate neendathano lyombepo Ondjapuki nali kale pamwe natseni nomomumvo nguka gwomumvo 1987.

Gideon N.Niitenge
Ongwediva High School

Dha za kep. 9

oyendji yomoshigwana, komukanka naanaa ngoka lya thikama, opwa pumbiwa elongekidho lya konakonwa nawa okwaadha ethikilo.

PaRadio ya SWA yOshimbulu yeti 26.2.1987 oya ti omusamane-Pieter Kalangula okwa hokwa okukonakona oshipopiwa shaNgoloneyandjaji. Epopyo lyOradio otali koleke shono sha popiwa koshilyo shongundu ya SWANU, omusamane Ngariorombe omasiku ngoka.

Okwa ti moonkundathana dhOkabinete nomupresidende P.W.Botha 15.10.1986 sho kwa ka pulilwe epangeli li gwedhelwe oonkondo, Ngoloneyandjaji okwa hololele kutya oye li moonkundathana nomusamane Kalangula. Shoka omusamane Ngariorombe okwe shi holola aniwa ongoshiholekwa, sha zi mongeyo sho kwa tiwa kutya kaye lile po oshigwana.

Kape na oopaati dhomihoko dhAatiligane mepangelo ndyoka lyetaaguluko dhu uvika tadhi yematele oshipopiwa shaNgoloneyandjaji, nokape na ngiika nando ogumwe muNamibia a tegelela dhu uve nayi sho omatokolo ga SWA ge na okuza aluhe ku SA.

Ewi lyAatiligane muNamibia olyu uvika ashike molupe lwepandulo kopaati yaHestigde Nasionale Party (H.N.P) kayi shi oshilyo shepangelo ndyoka) okupandula Ngoloneyandjaji sho a tekele noshipopiwa she poshimeno shokatongotongo opo shi wape okuvala nawa.

Okuza 17.6.1985, epangelo lyetaaguluko sho lya tulwa po ku SA koshipundi, omwaalu omunene gwoshigwana gwomeni lyoshilongo nomuuyuni, ogwe shi tala ko kutya, itali ka taaguluka sha, ihe okudhikitha owala ombili, uuyuki nelandulathano mbyoka ya yuulukiwa moshilongo yi etwe po mbala.

Sebulon Ekandjo

Teofilus Amagulu Joseph mlilo-
logo, Othika mUukwambi, okwa
mana oondjenda dhe 9.1.1986
moshiponga sheipumo mumwe
lyihauto. Okwa li e na oomvula
29.

*Peha Iyaamwayina
Hilma Joseph
Ogongo*

+++++

Kuku Benyamin Ashipembe Ne-
gonga, omukunda Ondiyala me-
gongalo Uukwiyu mOndonga, o-
kwa mana oondjenda dhe moshi-
pangelo shaShakati 27.1.1987
sho a kala te chama ethimbo ele.
Eimbilo 617.

*Julia Magano Vulika
Omushimani*

Erastus Natangwe Atshino ya-
Shilmi, Oshuuli mOlupumbu, o-
kwa mana oondjenda dhe o-
mbaadhilila moshiponga shoshi-
hauto 25.10.1986. Okwa li gwo-
mimvo 42. Okwa thigi ko omu-
kulukadhi gwe naanona 11.

Kashishandje Joseph

+++++

Omafiku 29.1.1987, Omwene o-
kwa ifana po omupiya waye tate-
kulu Lukas Haulyauke, mouye-
hame wefimbo lixupi moshipa-
ngelo mOshakati.

Omushamane Haulyauke oye u-
mwe wovatotipo veongalo Ee-
mbaxu, nokwa longa moukulu-
nuongalo efimbo lile.

Xe younona vatatu, nakufya
Haulyauke okwa fiya ko omuku-
lukadi waye, nokwa xulifa me-
pupi leedula 69. Eps.86:11,17.

*Umwe womovatekulu
Sevelinus Hakandume*

+++++



Egameno lyomuhingi gwoshihauto ewanawa, uuna ta hingi mondjila ya ndandala na-
wa, osho wo oondjila ohadhi kala megameno uuna tadhi hingwa komuhingi a kukuta.

EPULO

Nandi kwathwe ndi yelithilwe kombinga yiigandjwa.

Ngame omunashilonga ndele iilonga yandje kayi shi
yaaluhe. Ohashi vulika ndi pewe nande efudho lyoo-
mwedhi 6. Ngashingeyi ondi na okufuta iigandjwa
yandje ngilini? Oshoka onda yalulwa omunashilonga
ngame ndaa na iilonga tayi kalelele. Tangi kekwa-
tho.

*Gweni
N.Petrus Malapi
Okaku*

Eyamukulo

Ngele ondjambi yoye komwedhi inayi adha R100,
nena oto futu ngaashi ngoka waa na iilonga.
Ngele oya thika po nenge ya konda po nokuli,
nena oshitumulongo oto shi pulwa ashike sho-
mwedhi ndhono u li miilonga. Oomwedhi 6 itadhi
yalulwa, oshoka ku li miilong.

Amushanga gwOmukwetu

“Omugundjuka Omunamibia ti imbi”

1. Shigwana shOmuwa tonata
Ngu u tale oshipala shOmuwa
Shilonga mepya lye u ye
U ka longe ngu ka teye
2. Shigwana shaNamibia
Pulakena Omuwa ti ithana
Te ku kongo mpoka u li
Zapo matuka u ye kuye
3. Kalunga oondunge okwe ku pa
Mayele nuunongo osho wo
Longitha ngaashi to vulu
Namibia u pendule po
4. Oomwenyo; aasita katu na
Uunongo; aalongi katu na
Uukolele; aapangi katu na
Shigwana shandje ou li peni?
5. Thigapo ayihe yuuyuni
Nesimano alihe lyayo
Landula Jesus mondjila
Ndjoka yu uka muKaanana
6. Shigwana shaNamibia ino tila
Jerusalem owa longekidhilwa
Egipiti osho na kale, Kalunga
Ne mu dhimine po, oshoka
Shoka taNingi ke shi shi.

OMUKWETU

Oye oshifo shOngeleki Onkwaevangeli paLuther yo-
muSWA/NAMIBIA.

Ohashi nyanyangidhwa mOshinyanyangidho shOngeleki
mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekandjo.

Ondando yOmukwetu muNamibia naSouth Africa R6,00
komumvo.

Palwe muAfrica R10,00 nokombanda yomafuta R14,00
komumvo. Mondhila R17,00.

Oondando nomambesitelo agehe naga tumwe kOmukwetu,
Oniipa, P/Bag 2013, Ondangwa, 9000.

ELOC PRINTING PRESS
PRIVATE BAG 2013, TEL. 11, ONDANGWA 9000
SWA/NAMIBIA

Ou shi shi tuu nokutya

Omushili womakaya ote li monikila momadidiliko
ngaashi taa landula apa:

- Omayoo oye oku na cenghulundja nokwa kaka.
- Oifudo yaye otai shilwa noudjuu.
- Okanya kaye oka kanifa eenelive dokudimbulula
ounyenye wokulya noululu.
- Oifudo yaye oya nyika edimba lomakaya.
- Eenjala domushili womakaya odi yadi eemhindo
kokupya komakala. Omukalo muwa wokulikeele-
la komakaya oku he a kuma nandenande.

